

թիւն կար. երեկոյեան, մօտակայ դպրոցի աշակերտները գալիս դրօսնում էին, սիրահարւում, հառաչանքներ քաշում. կիրակիները չտեսնուած եռուղեո էր:

Այժմ ամէն ինչ այրուած է: Պատերի մի քանի կմախքներ են մնացել: Հողերը կուտակուել են, հիմքերը ոչնչացել: Փոշիները բարձրանում են հովերի շրթունքների մօտ եւ ուժասպառ պառկում անձրեւների ծեծի տակ:

Աւերանք եւ խեղճութիւն:

Երբեմն քաղաքից տխուր եւ մտազբաղ մարդիկ են գալիս, ձեռնափայտի ծայրով սահմաններ որոնում, լուսօրէն վիճում եւ էլ չեն վերադառնում:

Աւերակների ծայրին մէկը վերաշինել է իր տունը: Ամերիկայում աղաքականներ ունի՝ փող են դրկել: Գիշերները նա առատօրէն լուսաւորում է իր տունը, նստում պատշգամի առջեւ, եւ ձայնը գլխին, մեղամաղճոտ թրքերէն երգեր երգում:

Ինչքա՛ն տխուր է այս ձայնը խաւար փողոցի ծայրին:

Մեր տանը կպած ուրիշ երկու երեք տներ կան:

Ինքնամփոփ հայ բողոքական ընտանիքներ են, որ Ամերիկան տեսած են: Տղամարդիկ երեկոյեան վերադառնում են, անխուսափելի դեղին պայուսակը իրենց ձեռքին, շտապ քայլով, լուրջ եւ մտազբաղ մտնում ներս: Մի քիչ յետոյ երգեհոնի ձայն է լսում, եւ մարդ չի իմանում՝ աղօթում են թէ՛ զուարճանում:

Տանտիրուհիներս, վաղուց որբացած, խոնարհ, այս բնակարանի ամսավճարով ապրող հայ օրիորդներ են: Դպրոց տեսած, բանաստեղծութիւնը սիրող, տխուր, նշանման սեւ աչքերով աղջիկներ:

Նրանք վարժ են երկարօրէն դիտել վերջալոյսերը, ծառի տակ նստել եւ երազել, առաջի բացուած կոկոնի շքեղութիւնով հրճուել, հարուստ ածականով ոգեւորուել:

Ու Սկիւտարը ամբողջովին այսպէս է: Նա ունի իր ուրոյն մտայնութիւնը, իր աւանդութիւնները: Նա գաւառ է եւ քաղաք:

Սկիւտարը սկիւտարցու համար զբերթէ հայրենիք է: Մնայուն, տոկուն մթնոլորտ կայ այստեղ, օդի, ծառի, տեսարանի եւ հոգիների հետ կապուած:

Այն ինչ որ անկարելի է թւում Պոլսում, կարելի է այստեղ:

Սկիւտարը վաւաշոտ չէ, այլ սիրահար է: Մեծ տրամութեամբ նայում է դէպի Ասիա, ոգեւորում է Արեւմուտքով:

Այստեղ մարդը օժտուած է եղակի յատկութիւններով: Ճկուն է նրա բանականութիւնը, նուրբ է զգացողութիւնը եւ, Չամլճայի օդի նման, թրթռուն է սիրտը:

Սաղաղ եւ վերասլաց, երկինքի հետ խօսող, աստղերի հետ պլպլող, դադափարը ընդգրկող տենչը կայ, որ, իրիկնամուտին, հեռուից եկող, բլւրեղեայ ջութակի ձայնն է յիշեցնում:

Սկիւտարը ամբողջ մի մտայնութիւն է հայ իրականութեան մէջ: Նոճին, աստղը, բլուրը եւ ծովը շղարշով վերջալոյսը՝ այդ մտայնութեան հիմնական նշանաբաններն են:

Դուրեանը՝ ամբողջովին հեւք է, սարսուռն մեղեդի, աստղերի շուրջը մեղամաղճօրէն պտտող ոգի: Նրա տրամութիւնը բաղձանքներով լեցուն է, նրա հեկեկանքը թռիչք է եւ վըշտոտ ցանկութիւն:

Ռ. Պէրպէրեանը՝ իղեալիստ եւ դաստիարակ: Բլուրը, որ պէտք է մագլցել, որ պէտք է զարդարել: Մի տեսակ միամիտ հաւատք, իր պարտեցում տնկած շոճիի նման՝ ըստ Տէնի, ամենամտաւորական ծառը:

Եղիա Տէմիրճիպաշեանն էլ այստեղից է: Ունող դերվիշի եւ յոյզ որսող մենակեացի տարօրինակ խորհուրդ: Հայ կեանքի ամենախորհրդաւոր ոգիներից մէկը: Շանթահարուած նոճի, որի մէկ ճիւղը վայր է ընկել դերեղմանի վրայ:

Պոլիսը նրա համար Գալաթիայի եկեղեցին է, որի առջեւ նա երկարել է իր մուրացկանի ձեռքը: Ա՛հ, բանաստեղծի շունդալից ապտակը հայ քաղցեհիների դէմքին...

Եւ ահա ուրիշ մի մեծը. Ինդրան, Չրաքեանը: Ինչպէ՞ս կարելի է հասկանալ «Ներաշխարհ» առանց Սկիւտարի: Նոճաստանում քամիները թաքուն խօսքեր են ասում, երկնքի սեղանի վրայ հաղարաւոր մոմեր են վառուել, ծովը բարձրաձայն պատարագում է:

Չրաքեանը իր դոյացման ձեւը տեսնում է նոճիի դասական կառուցուածքի մէջ, իր եսը որոնում է խոնարհ բոյսերի անմիջական ճար-